

## PKPB jadi alasan kenaikan harga cili, kacang bendi di Alor Setar

Adie Sufian Zulkefli, Astro Awani | Diterbitkan pada Mei 19, 2020 10:48 MYT | Durasi: 1 minit, 10 saat



Harga sayur-sayuran di Pasar Besar Alor Setar meningkat, paling ketara cili merah dan kacang bendi. - Gambar fail

**ALOR SETAR:** Harga sayur-sayuran di Pasar Besar Alor Setar dilaporkan meningkat, paling ketara membabitkan cili merah dan kacang bendi.

Harga sekilogram cili merah naik dari RM11 kepada kini mencecah RM16 manakala kacang bendi dari RM5 naik menjadi RM6 sehingga RM7.

Menurut peniaga Putra Adam Marwan Mawardi, 21, kenaikan harga itu didakwa di pihak pemborong yang memberi alasan tidak dapat menghantar barangan ekoran Perintah Kawalan Pergerakan Bersyarat (PKPB) yang membataskan pergerakan mereka merentas negeri.

"Sebab hendak pergi ambil, tidak boleh rentas negeri. Bendi dari Pulau Pinang, sebab itu tidak boleh pergi ambil.

"Sebab itu harganya mahal sedikit," katanya yang mendakwa kebanyakan pemborong adalah dari Pulau Pinang dan Perak.

Seorang lagi peniaga mendakwa kenaikan harga barangan itu berlaku sejak seminggu lalu.

Sum Sew Ling, 48, berkata sebelum ini harga sekilogram cili merah ialah di antara RM10 dan RM11 sahaja berbanding RM16 sekarang.

Sementara itu, Ketua Pegawai Penguatkuasa Kementerian Perdagangan Dalam Negeri dan Hal Ehwal Pengguna (KPDNHEP) Kedah, Omar Ismail memaklumkan pihaknya melakukan pemeriksaan di seluruh pasar awam setiap hari untuk memastikan tiada peniaga yang menaikkan harga cili dan bendi.

Bagaimanapun, beliau mengakui kekurangan bekalan daripada pembekal dan kesukaran pemborong untuk menghantar sayur-sayuran mengakibatkan harga meningkat.

Bagaimanapun katanya, KPDNHEP akan membuat Skim Kawalan Harga menjelang Hari Raya Aidilfitri ini bagi mengelak ada pihak yang mengambil kesempatan.

<http://www.astroawani.com/berita-malaysia/pkpb-jadi-alasan-kenaikan-harga-cili-kacang-bendi-di-alor-setar-243519>

